

廣
成
子
疏
略

王文祿
撰

中
華
書
局

CU752/0303

廣成子疏略

此據百陵學山本
影印初編各叢書
僅有此本

廣成子疏畧序

嘉靖癸亥春正悟天地橐籥之旨撰中說嘆中由堯始發聖學之原也子思述中庸後無聞焉曰主敬曰先知不特第二義去中遠矣千餘年間豈無深探洙泗之源者乎何見殊也暇語淡泉鄭公曰正德庚辰從百可園游師友英賢極一時之選子武胄劣童耳蒙與進頗嗜詩書耆矣猶不廢學天啓予心直遡執中之傳何幸乎鄭公曰先吾校翁能知子予弗及也學無止法上進曷窮使堯孔生存學尤敏也予憬然悟欲求羲黃以上之學渺不可得世豈無廣成子之

儔乎有則子當師之仲春遊武林遇徐龍陽于昭慶
談玄出中說以質曰此世教法順焉爾矣子異此義
黃來逆數也廣成許由緒視治功脩身惟急更創天
地教外別傳逆轉爲出世之學堯不得而聞也魏伯
陽後無傳焉鍾呂子不能知也不冲舉而尸解豈形
神俱妙乎皆鬼也非仙也烏得爲長生子奇之邂逅
行不及深扣夏孟同年方十洲兄寄予廣成子解范
東明訂者閱之喜甚足慰予求師之心殆精神感召
乎按廣成子黃帝師之聞至道其問答語載莊子在
宥篇蘇東坡取爲解晁景迂序之見文獻通考解雖

晦表章甚高蓋寤寐廣成游羲黃之上超卓之見也
絀思月餘始克援筆要惟守一故不外中道德南華
冲虛參同契皆本此萬世玄學之宗祖也悟之誠可
冲舉非結胎出神之術黃帝師之宜哉以故後有陰
符素問之篇傳而能習也十洲兄簡曰徐龍陽固奇
矣以廣成子之意推之可燭焉蓋少之也欲勉進予
于廣成子之儔何厚乎予想天地大矣異人何代無
之特舉業盛行科第耽炫有亦隱埋姓名渾于窈冥
昏默之中而如愚似醉安可察知乎予疏未知是否
欲就質于廣成子之儔無見也梨印寄十洲兄以謝

教愛之自武林山水之會四達之達仙靈游集之數
十洲兄好道過予如有遇焉不靳報予予卽泛扁舟
拜扣請教噫歲月剎那邯鄲夢短寧不急求出世之
學以延餘生可乎不然負此天付聰明汨沒塵勞耗
散元神同歸于土化爲異類而獲罪于天矣矧今
天開玄運統一義黃甲子中元謂有八百地仙出幸
其時也可自棄乎必有廣成子之儔鑒予下忱以教
予予日望之序不盡疏疏不盡言言疏畧以續解徐
名夢易方名九叙同浙人疏中姓名皆直書帝師前
不敢諱也是歲端午海鹽沂陽生王文祿世廉撰

廣成子

浙嘉郡武原王文祿疏畧

黃帝立爲天子十九年令行天下聞廣成子在於空同之上故往見之曰我聞吾子達於至道敢問至道之精吾欲取天地之精以佐五穀以養民人吾又欲官陰陽以遂羣生爲之奈何

帝稱黃黃精之君土德王也詳見史記廣成子一曰力默子也治易屯蒙運行日月隱居空同山黃帝立爲天子至尊矣十九年令行天下治久化敷矣廣成能聞好道求師左右揚也空同往見重道輕身不自滿也先食粒民司天育物致和調燮也

此始問云

廣成子曰而所欲問者物之質也而所欲官者物之殘也

而汝也後凡言而汝皆指帝言物者形而下之器也天地陰陽之類是也質迹也殘餘也欲問與官迹之餘也廣成以而汝稱帝且以帝外身求道道之粗非道之精故少之也

自而治天下雲氣不待族而雨草木不待黃而落日之光益以荒矣

荒耗也雲氣不族而雨陽易洩生意微也草木不

黃而落陰太縱殺氣盛也日月陰陽之精也陰陽
垂光尤耗也豈治微乎所以進之也

而佞人之心翦翦者又奚足以語至道

佞口才也心指所欲也翦翦猶瑣屑也斥所問爲
佞而拒不語也帝好道受言退自修省

黃帝退捐天下築特室席白茅閒居三月復往邀之
廣成子南首而臥黃帝順下風膝行而進再拜稽首
而問曰聞吾子達於至道敢問治身奈何而可以長
久

退往見回也捐天下靜不煩也築室席茅專而朴

也閒居三月久靜也所以齋戒也南首臥自適也
忘勢也殆以倨試乎順下風膝行進再拜稽首執
禮愈卑也今問治身知要也非始問比殆退省有
進歟

廣成子蹙然而起曰善哉問乎吾語汝至道

蹙然起誠敬感動也善其問以治身也知治身則
至道可語也人皆知治身則不治天下而天下治
矣蘇軾曰廣成子至此始以道語黃帝乎其受道
豈始於此乎王生文祿曰疑之是也天命率性人
同此道也客氣勝則迷克盡客氣則見故文曰吾

觀廣成子之拒黃帝也其語至道已悉矣善悟哉
至道之精窈窈冥冥至道之極昏昏默默

至極也一陰一陽之謂道至道無極而太極也精
純粹精也原其初也極猶致極也要其止也至道
之精始問也述而申言窈窈冥冥太虛也隨言其
極昏昏默默致虛極也後曰入于窈冥之門可見
大明亦太虛一也

無視無聽抱神以靜形將自正必靜必清無勞汝形
無搖汝精乃可以長生目無所見耳無所聞心無所
知汝神將守形形乃長生慎汝內閉汝外多知爲敗

此長生要語也神者性命之根太虛之靈氣也乾
坤闔闢之元父母交感之意故岐伯曰兩精相搏
謂之神神內存曰抱靜常存曰以形正而曰將自
弗助也視聽兩無靜也靜者太虛之體也抱神以
靜形將自正形神一也由昏默以入窈冥乃一章
大旨無視目無見也無聽耳無聞也抱神以靜心
無知也無勞形無爲也所以閉外也無搖精無慾
也所以慎內也清者靜之澄也必靜與清不特以
之而又必之決之也慎內內不出外外包內也抱
神也閉外外不入內內包外也守形也長生形神

俱妙也合外內之道也多知戾無知損心也內外
鑿而形神離敗壞而不長生也皆反覆詳勉帝也
惟患多知知識也大雅曰不識不知順帝之則孔
子曰無知也卽窈冥昏默云

我爲汝遂于大明之上矣至彼至陽之原也爲汝入
于窈冥之門矣至彼至陰之原也

至陰之原至陽也至陽之原太虛也陰陽互根也
以原陽之神煉至陰之質而復太虛之體由昏默
以遂于大明之上而入于窈冥之門應前窈窈冥
冥云遂專往也入深造也至推極也曰遂曰入曰

至一神爲之也蘇軾曰陰陽如日月水火之用所以修煉變化堅氣而凝物者也蓋必有方矣然皆必致其極不極不化也兩言爲汝示切要云

天地有官陰陽有藏

官司也治也有官者神官之也始問取天地精今曰有官神不亂也藏潛也蓄也有藏者神藏之也始問欲官陰陽今曰有藏神不洩也始問治天下再問治身今答則因始問而歸之身也蘇軾曰天地有官自爲我治之陰陽有藏自爲我蓄之林希逸曰天地陰陽卽吾身之健順也

慎守汝身物將自壯

因再問治身故歸之帝身身者任道之器天地陰陽之官神之宅也物者天地陰陽萬物也慎卽慎內閉外也守卽神守形也壯強也天地位陰陽和萬物育也猶後守一處和而形不衰也蓋煉成純陽生意充足形神俱妙天地陰陽在我矣有何不壯而長久乎此二句本前抱神以靜形將自正勉帝體之也朱得之曰取精佐穀官氣遂生皆慎守之餘事耳

我守其一以處其和故我修身千二百歲矣吾形未

營衰

因再問治身故徵我之修身守一形神不離也猶抱一守中也處和形神俱妙也猶和光致和也千二百歲曰我脩身歲歲修之功不息也形未嘗衰脩之徵也卽慎守自壯抱神以靜形將自正也蓋指我以示帝欲帝信而治身非誇壽也褚伯秀曰千二百歲特揆人間短景一紀之數若要其分靈降氣生化之原則亘古竊今可也

黃帝再拜稽首曰廣成子之謂天矣

天包地猶陽包陰天陽也於穆不已無不貫也氣

內完而不洩故天地長久形陰也猶地也神陽也
猶天也神居形內猶天在地中氣外洩不能長久
廣成抱一處和形神相守氣不外洩長久不衰猶
天然帝悟加禮謝教稱曰天與天一也深知廣成
堪受至道云陰符經首曰天道天行帝亦天也
廣成子曰來余語汝彼其物無窮而人皆以爲終彼
其物無測而人皆以爲極

來進之也語汝再囑之也欲勝至道也前言物之
質殘今言物無窮測又何終極況人物一也形上
起見妄分終極渥有窮測神本無方豈有終極而